



# STARFSSKÝRSLA

Sambands íslenskra kristniboðsfélaga

**STARFSÁRIÐ 2018-2019**

LÖGÐ FRAM Á AÐALFUNDI 15. MAÍ 2019



## Inngangur

Samband íslenskra kristniboðsfélaga var stofnað í tveimur áföngum árið 1929 og yfirstandandi ár markar 90 ára afmæli starfsins. Elsta aðildarfélagið nær 115 ára aldri í nóvember og ræturnar liggja því langt aftur. Starf SÍK var frumkvöðlastarf að mörgu leyti fyrstu áratugina. Í tímans rás hefur boðun og kærleikþjónusta snert líf fólks í tugþúsundatali og milljónatali ef allt fjölmiðlastarfið er með talið. Við þökkum öllum, sem með einum eða öðrum hætti, hafa stutt starfið eða einstök verkefni þess.

## 1. Alþjóðastarf

### Eþíópía

Megnið af verkefnum kristniboðsins eru í svokallaðri Suðvestur-Sýnódu Mekane Yesu kirkjunnar. Þrátt fyrir að hafa ekki fasta kristniboða í landinu eins og er styður Kristniboðssambandið við bakið á starfinu með margvíslegum hætti. Samstarfskirkjan, Mekane Yesu (EECMY) telur 8,8 milljónir manna og er stærst lúterskra kirkna á heimsvísu og vöxturinn ör.

### Kirkju- og safnaðarstarf

SÍK styrkir ýmis verkefni á vegum kirkjunnar, svo sem þýðingu Biblíunnar á tungu Tsemaimanna sem búa í Voitódalnum og umfangsmikið boðunarverkefni til nýrra staða. Í Ómó Rate greiðir SÍK helming launa umsjónarmanns starfsins. Starfið í Ómó Rate er enn ungt en þar eru mörg tækifæri til starfa ef við hefðum fólk til að vera á staðnum. Meðal annarra verkefna í landinu er styrkur við nemendur presta- og leiðtogaskóla og biblíuskóla kirkjunnar í Addis



Abeba og rekstur biblíu- og kristniboðsskólans í Awasa.

Kirkjan í Konsóhéraði telur rúmlega 60 þúsund manns sem skiptast á 85 söfnuði.

### Þróunarverkefni

Lestrarverkefnið í Ómó Rate hefur nú staðið yfir í níu ár og miðar að því efla lestrarkunnáttu almennt og að kenna fólki að kenna öðrum að lesa. Verkefnið Af götu í skóla fór af stað í lok árs 2007 og hefur gengið vel. Um 30 börn og fjölskyldur fá hjálp til að koma í veg fyrir að börnin betli á götum höfuðborgarinnar Addis Abeba.

Nú er bygging heimavistar fyrir stúlkur í framhaldsskólanámi í Konsó langt komin. Byggt er fyrir arf frá Maríu Finnsdóttur. Guðlaugur og Karl Jónas Gíslasynir heimsóttu Konsó í haust til að tryggja framgöngu verkefnisins en stefnt er að því að ljúka því fyrir árslok.

### Kenía

Norðvesturbiskupsdæmi Evangelísk lútersku kirkjunnar (ELCK NWD) í Keníu er samstarfsaðili okkar og starfssvæðið er Pókothérað og nærliggjandi sveitir og héruð í Keníu. Framkvæmdastjóri SÍK dvaldi tæpan mánuði í Keníu í febrúar og mars til að líta til með starfinu, fylgjast með uppbyggingu skóla og kenna á endurmenntunarnámskeiði prédikara og djákna.

Biskupsdæmið hélt upp á 40 ára afmæli starfsins með veglegum hátíðarhöldum í desember. Fulltrúar SÍK voru þeir Skúli Svavarsson og Vígfús Ingvar Ingvarsson.

### Kirkju- og safnaðarstarf

Stærsta framlag okkar til kirkjustarfsins er stuðningur við útbreiðsluverkefni kirkjunnar en á vegum þess starfa fjórir prestar og nokkrir prédikarar sem studdir eru til náms. Starfið hefur farið vaxandi og

teygir sig inn í nærliggjandi héruð og lönd. Fylgt er markvissri áætlun um að fara til nýrra staða sem flestir eru úr alfaraleið. Þar á meðal eru svæði innan Túrkana, Baringo, Marakwet og nágrannalandsins Úganda.

Söfnuðir og starfsstöðvar Norðvesturbiskupsdæmisins eru nú um 250 talsins. Kirkjan biður um sjálfbóðaliða eða kristniboða til starfa í styttri tíma í senn til að sinna fræðslumálum og ráðgjöf.

### Þróunarverkefni

Kirkjan hefur í samstarfi við kristniboðssamtök og þróunarstofnanir á Norðurlöndum byggt um 100 grunnskóla í Pókotsýslu og um tuttugu framhaldsskóla, sem eru þó ekki allir fullbyggðir. Kirkjan hefur tekið að sér enn fleiri grunn- og framhaldsskóla sem styrktaraðili í þeirri von að geta mætt þörf heimamanna og ósk um menntun. Skólaganga hefur margt gott í för með sér og ýtir m.a. undir jákvæða þróun samfélagsins og lýðræðishugsun. Nú þegar hlýtur hópur barna og unglinga styrk til náms en flestir styrkirnir eru gefnir af einstaklingum hér heima til einstaklinga eða fjölskyldna úti.

Síðla árs lauk skólaverkefninu Menntun á jaðarsvæðum þar sem byggðar voru tvær kennslustofur við fjóra skóla, þrjá innan Pókot og ein innan Túrkana. Í haust hófst bygging stúlknaframhaldsskóla í Kamununo í Norður-Pókot með heimavist, tveim skólastofum og skrifstofubyggingu. Bæði þessi verkefni voru fjármögnuð að miklu leyti af Þróunarsamvinnuviði utanríkisráðuneytisins. Hallgrímiskirkjusókn í Reykjavík fjármagnar framlag SÍK við skólann í Kamununo. Ráðuneytið styrkir nú einnig lokafrágang skrifstofubyggingar við stúlknaframhaldsskólann í Propoi en þar eru nú tæplega 600 nemendur.



## Japan og Suðvestur-Asía

Upphafsr Kristniboðssambandsins á alþjóðavettvangi voru í Kína. Árið 2010 bættist Japan við sem kristniboðsland. Aðeins um 1% þjóðarinnar telst kristinnar trúar. Leifur Sigurðsson, kristniboði starfar þar ásamt eiginkonu sinni Katsuko á Rokkó-eyju, úthverfi Kobe í Japan. Þeirra hlutverk er að ná til nýrra í nærumhverfi sínu en Leifur sér um ungmennahóp kirkjunnar, prédikar mánaðarlega og leiðir biblíulestra bæði í kirkjunni og heimahúsi. Auk þess vinnur Leifur að verkefnum fyrir samstarfsaðila okkar, Norska lúterska kristniboðssambandið (NLM) sem formaður starfsstjórnar í Japan.



### Tjaldgjörðarkristniboð og annað starf

Aðalfundur samþykkti fyrir sex árum að stíga skref í átt að vaxandi tjaldgjörðarkristniboði sem byggir á því að fólk fer til starfa en sér sjálfu sér farborða. Það sinnir kristniboði í frítíma sínum sem sjálfbóðaliðar. Hluti af því er samstarf við hjónin Noru og Gísla Jónsson sem starfa við ráðgjöf og baráttu gegn mansali í Búlgaríu. Samstarfið felst í því að taka við söfnunarfé til starfs þeirra,

styrkja þau lítlisháttar og miðla fréttum og fyrirbænafeinum hér á landi. Kristniboðssambandið styrkir einnig Janet Sewell kristniboða sem vann fyrir Hellenistic Ministries í Grikklandi en er nú að hluta í framhaldsnámi og að hluta að sinna verkefnum fyrir Lausanne-hreyfinguna.

Sjálfbóðaliðar tengdir SÍK studdu ekkju frá Sýrlandi, með stöðu flóttamanns í Suður-Evrópu, sem varð kristin á flóttu sínum. Stuðningsaðilar stofnuðu sérstök samtök um verkefnið en henni var vísað úr landi í mars.

### Fjölmiðlastarf

#### NOREA og Sat-7

SÍK styrkir ákveðnar sendingar NOREA-radio og samstarfsaðila til Kína. Markhópur þessara sendinga er einkum fólk á landsbyggðinni sem ekki kemst í kirkju og hefur takmarkaða þekkingu á kristinni trú. Framlag okkar í ár er 25.000 norskar krónur, og var lækkað um helming til að styrkja undirbúning sjónvarpsstarfs í Pakistan, Pak7.

SÍK er samstarfsaðili Sat-7, samkirkjulegs sjónvarpsstarfs í Mið-Austurlöndum og Norður-Afríku. Framlag Kristniboðssambandsins er rúmlega 15.000 bandaríkjadalir á ári. Um 80% af dagskránni er framleidd af kristnu fólki á heimavelli á arabísku, tyrknesku eða farsí. Með boðun, fræðslu og uppörvun er





reynt að styrkja kirkjurnar og kristið fólk á svæðinu til að iðka trú sína í aðstæðum sem oft eru mjög erfiðar.

Fimm rásir heyra nú undir Sat7, þar af ein sem er eingöngu með barnaefni. Sat7 hefur tekist að fá sendingar inn á þá gervihnetti sem mest eru notaðir í Mið-Austurlöndum og nú er tyrkneska rásin send út á ríkisreknum gervihnetti. Áhorfendur Sat7 eru, samkvæmt nýlegum mælingum, um 21,5 milljón.

Sat7 er kristileg sjónvarpsstöð en nokkrir þættir eru hugsaðir til að bæta kjör og líf áhorfenda. Er það ekki síst til að ná til stórs hóps áhorfenda sem eru ólæsir og rjúfa einangrun þeirra. Árið 2017 fór af stað ný rás, skólasjónvarp, Sat7 Academy, sem ætluð er börnum sem ekki geta gengið í skóla vegna stríðsátaka og þeim sem búa í flóttamannabúðum víðs vegar í Mið-Austurlöndum. Skólasjónvarpið nýttist einnig þeim sem ekki hafa fengið menntun, ekki síst konum.

## Önnur erlend tengsl og samstarf

Kristniboðssambandið er í tengslum og samstarfi við ýmsa aðila erlendis. Helst er að nefna NLM, en starfið í Eþíópíu, Keníu og Japan er unnið í samstarfi við það. Samráðsfundir eru einu sinni á ári.

SÍK er einnig í samstarfi við ungliðahreyfinguna, NLM-Ung og Fjellheim, biblíuskóla NLM í Tromsø í Norður-Noregi, en hópur frá skólanum heimsótti landið í viku í september eins og undanfarin ár. Í haust var undirritaður samstarfssamningur við NLM-Ung til fjögurra ára sem felur m.a. í sér styrk til SÍK til að greiða laun ungmennastarfsmanns.

Samskipti við kirkjurnar í Eþíópíu, Japan og Keníu fara að mestu í gegnum NLM, en þó ekki einvörðungu. Bein tengsl eru við Konsó og Suðvestursýnódu Mekane Yesu kirkjunnar í Eþíópíu og við Norðvesturbiskupsdæmi kirkjunnar í Keníu.

SÍK er aðili að Nordisk Indremisjonsráð og situr framkvæmdastjóri í stjórn þess.

SÍK er fulltrúi Íslands í European Evangelical Missionary Alliance (EEMA). Kristín Bjarnadóttir sótti ásamt fimm sjálfboðaliðum ráðstefnuna Refugee Highway Commission á vegum kristilegra samtaka sem haldin var í Bosníu í febrúar síðast liðnum. Framkvæmdastjóri er einn af tengiliðum Lausanne-hreyfingarinnar hér á landi. Ýmis önnur óformleg tengsl eru við samtök og einstaklinga erlendis.

## 2. Innanlandsstarf

Störf stjórnar og starfsmenn á heimavelli

Eftir aðalfund 2018, sem haldinn var 16. maí, sátu eftirtalin í stjórn SÍK: Ásta Bryndís Schram formaður, Kristján Sigurðsson varaformaður, Guðlaugur Gunnarsson ritari, Hermann Bjarnason gjaldkeri og Willy Petersen. Sigurður Pálsson og Bryndís Schram Reed voru kjörin sem varamenn til eins árs. Ragnar Gunnarsson, framkvæmdastjóri Kristniboðssambandsins, hefur einnig setið fundi stjórnar. Stjórn SÍK fundaði átta sinnum á starfsárinu. Helstu viðfangsefni stjórnar voru stefnumótun, fjármál, skipulags- og starfsmannamál, starfið á kristniboðsakrinum og starfið á heimavelli. Aðrir starfsmenn eru Kristín Bjarnadóttir og Kristján Þór Sverrisson í fullu starfi og Ólafur Jón Magnússon og Ragnheiður Arnkelsdóttir í hlutastarfi. Starfsfólk Basarsins eru Karl Jónas Gíslason í fullu starfi en Anna Sigurðardóttir og Bjarni Árnason í hlutastarfi. Tsige Yirga sér um þrif Basarsins og Kristniboðssalarins. Starfsfólk sinnir boðun, fræðslu og kynningu starfsins, ungmennatengslum og sér um útgáfumál, umbrot, bókhald, afgreiðslu og fjáröflun, auk annarra verkefna.

## Kynning og tengsl innanlands

Mestur hluti kynningar- og boðunarstarfs SÍK fór fram á höfuðborgarsvæðinu og nágrenni þar sem ýmsir hópar, félög og kirkjur heimsótt. Margir fermingarhópar innan þjóðkirkjunnar voru heimsóttir í vetur. Þeim sinnti Kristján Þór Sverrisson að mestu leyti ásamt konu sinni, Helgu Vilborgu Sigurjónsdóttur. Austurland, Norðurland og fleiri svæði voru heimsótt á starfsárinu.

Djákna- og guðfræðinemar heimsækja SÍK í stofnanakynningum hvert vor. Útvarpsguðsþjónusta á kristniboðsdaginn var frá Hjallakirkju þar sem Skúli Svavarsson kristniboði prédikaði.

## Kristniboðsfélög og einstaklingsaðild

Starfsmenn hafa tekið þátt í ýmsum fundum kristniboðsfélaganna sem eru burðarás Kristniboðssambandsins. Þar er fólk sem biður trúfastlega fyrir kristniboðinu, gefur reglulega til þess og sinnir ýmiss konar fjáröflun og sjálfboðaliðastarfi. Kristniboðsfélögin taka flest samskot á samverum sínum, sum hafa tekið að sér að kosta ákveðna þætti starfsins, mörg þeirra standa fyrir eða taka þátt í einhvers konar fjáröflun, s.s. fjáröflunarsamkomu, kaffisölu, matarkvöldi, jólabasar, skópokaburði og fleiru. Starf hvers kristniboðshóps eða kristniboðsfélags er mismunandi hvað varðar tíðni og eðli samvera.

Loks má geta þess að ýmsir vinir kristniboðsins, bæði á höfuðborgarsvæðinu og úti á landi, biðja fyrir starfinu og styðja það fjárhagslega af mikilli trúfesti eða sinna sjálfboðnum verkefnum, án þess að vera í kristniboðsfélagi eða einstaklingsaðilar. Allt þetta fólk leggur sitt af mörkum og myndar stóra heild og bakvarðasveit starfsins sem er ómetanleg. Er þeim hér með þakkað af alhug.

## Kristniboðsvika

Kristniboðsvikan í Reykjavík var haldin fyrstu viku í mars sl. Hún tókst vel og voru samverur vikunnar vel sóttar en dagskráin var vegleg og vel undirbúin. Yfirskrift



Eyerasalem Negiya

vikunnar var „Rétt leiðin?“ Undirbúningur var í höndum Helgu Vilborgar Sigurjónsdóttur, Ólafs Jóns Magnússonar, Höllu Marie Smith og Jóns Pálma Davíðssonar. Samverur vikunnar voru haldnar í Kristniboðssalnum. Gestir vikunnar voru Eyerasalem Negiya frá Eþíópíu og Kurt Johansen frá Sat7. Undirbúningur er hafinn fyrir kristniboðsvikuna 9. – 15. mars 2020 undir yfirskriftinni „Tilbúin, viðbúin, af stað!“

## Sumarmót

Árlegt kristniboðsmót á Löngumýri var haldið í júlí og voru mótsgestir mjög ánægðir. Á dagskránni voru biblíulestur, vitnisburðarstund, samfélagsstund, kristniboðssamvera og þátttaka í guðsþjónustu í Flugumýrarkirkju þar sem Haraldur Jóhannsson prédikaði. Í undirbúningsnefnd voru Skúli Svavarsson og Jón Oddgeir Guðmundsson.

## Kristniboðssalurinn

Eins og undanfarin ár eru samkomur í Kristniboðssalnum á hverju miðvikudagskvöldi. Trúfastur hópur fólks sækir samkomurnar, yfirleitt 25-40 manns. Áhersla er lögð á boðun Orðsins og gott samfélag. Í vetur var boðið upp á eina söngsamkomu og eina bænasmögu í mánuði og eftir jól eina fræðslusamveru í stað samkomu í mánuði. Boðað var til bænavaktar hluta úr sólarhring í janúar.

Í vetur var áfram staðið sameiginlega að samkomum á sunnudögum kl. 17 ásamt barnastarfi með Salti kristnu samfélagi. Auk samkomuhaldsins og félagsfunda Kristniboðsfélags karla og Kristniboðsfélags kvenna, sem eiga salinn ásamt SÍK, hafa ýmsir aðrir hópar fengið salinn að láni eða á leigu.

## Íslenskukennsla

Ókeypís íslenskukennsla fyrir fólk af erlendum uppruna hefur nú verið í boði í fjögur ár. Markmiðið er að veita þessa þjónustu og fá um leið tækifæri til að mynda meiri tengsl



við þennan hóp. Milli 70 og 80 manns hafa verið skráðir á misseri en kennt er nú í þremur hópum á þriðjudags- og föstudagsmorgnum. Kristín Bjarnadóttir sér um kennsluna en fjöldi sjálfboðaliða tekur þátt í verkefninu. Auk hefðbundinnar kennslu í íslensku er mikið sungið af íslenskum lögum og nemendur fá fræðslu í íslenskri menningu og kristindómi. Rannís styrkir námskeiðin.

## Basarinn

Basarinn er ekki einungis nytjamarkaður heldur einnig starfsstöð þar sem sjálfboðaliðar og starfsmenn komast í samband við fólk, kynna starfið, spjalla við það, veitir sálgæslu og fyrirbæn og fólki er boðið að taka þátt í starfi Kristniboðssambandsins. Basarinn heldur úti Facebook síðu sem tæplega nítján hundrað manns hafa merkt við sem ánægjuefni. Salan í Basarnum jókst aðeins í fyrra miðað við árið á undan.



Ungur sjálfboðaliði á Basarnum



## 3. Útgáfa og kynningarmál

### Kristniboðsfréttir

Kristniboðsfréttir eru prentaðar í 4.000 eintökum, komu fjórum sinnum og voru sendar til áskrifenda um allt land. Blaðið er mjög mikilvægur tengiliður við fjölda fólks og í blaðinu geta þau sem hafa áhuga

fylgst með fréttum af starfinu. Blaðið nær víða og viðtökur eru yfirleitt mjög góðar. Kristín Bjarnadóttir var ritstjóri blaðsins en Kristján Þór Sverrisson tók við af henni um áramótin. Tvisvar var sent með bréf um hvatningu um að gefa sumargjöf og jólagjöf til starfsins.

### Bjarmi

Bjarmi, tímarit um kristna trú, kemur út þrisvar á ári í 550 eintökum. Salt ehf. útgáfufélag gefur út blaðið í samstarfi við SÍK. Ritstjóri er Ragnar Gunnarsson en með honum eru Böðvar Björgvinsson og Vigfús Ingvar Ingvarsson. Prófarkalesari er Þorgils Hlynur Þorbergsson.

### Kristniboðspósturinn

Tölvubréfið Kristniboðspósturinn er sent út við og við með tilkynningar um viðburði og fleira. Flestir einstaklingar og félagar í aðildarfélögum SÍK, sem eru með netfang, fá póstinn, auk þess getur hver sem er óskað eftir honum. Um 250 manns eru á áskrifendaskrá. Kristján Þór Sverrisson hefur umsjón með póstinum.

## Almanakið


Kristniboðsalmanakið 2019 var gefið út í 9.000 eintökum. Hluta upplagsins var dreift í kirkjum landsins á kristniboðsdaginn og einnig í Basarnum næstu vikur á eftir. Almanakið var einnig sent með Kristniboðsfréttum til allra áskrifenda þess fyrir jólin. Almanakið er góð kynning þar sem það hangir uppi allan ársins hring.

## Vefsíðan www.sik.is

Heimasíða SÍK er einnig andlit okkar út á við. SÍK er einnig með síðu á Facebook þar sem atburðir eru kynntir og fréttum miðlað. Vinahópur Kristniboðssambandsins þar telur nú rúmlega 1.100 manns.

## Bókaútgáfan Salt ehf.

Salt ehf er í eigu SÍK. Í byrjun árs kom út endurprentuð útgáfa Orðsins eftir N. P. Madsen og á næstunni kemur til landsins Föndurbiblía barnanna. Þá er stefnt að útgáfu ævisögu Skúla Svavarssonar og Kjellrunar Langdal á árinu en höfundur er Vigfús Ingvar Ingvarsson. Vefsíða útgáfunnar er [www.saltforlag.is](http://www.saltforlag.is).



## 4. Samstarfsverkefni

### Samstarfssamtök

SÍK hefur í áratugi verið í góðu samstarfi við KFUM og KFUK og eins Kristileg skólasamtök og Kristilegt stúdentafélag. Starfsmenn hafa tekið þátt í samverum og mótum fyrir börn, unglunga og fullorðna, kynnt starfið og haft hugleiðingar og biblíulestra. Starfsmaður Kristilegu skólahreyfingarinnar (KSH) hefur

skrifstofuaðstöðu á skrifstofu SÍK og SÍK styrkir einnig launasjóð KSH með þeirri ósk að efla megi tengsl unga fólksins við SÍK. Sautján manna hópur tók þátt í kristniboðsmóti unga fólksins (UL) í Noregi í fyrrasumar og stefnir í nærri 30 ungmenni fari í ár. Ólafur Jón Magnússon sinnir ungmennatengslastarfi SÍK.

## Þjóðkirkjan og kærleikspjónustusvið Biskupsstofu

Góð tengsl og samstarf er við kærleikspjónustusvið Biskupsstofu. Kynning fór fram í mörgum kirkjum á liðnu starfsári og stundum er leitað eftir efni um kristniboð okkar Íslendinga. Kristniboðssambandið fékk í fyrra styrk úr Kirkjumálasjóði upp á 3 milljónir króna. Samsköt til starfs okkar eru tekin reglulega í nokkrum kirkjum í Reykjavík og við Tómasarmessur í Breiðholti kirkju en SÍK er í samstarfi um þær. Mörg prófastsdæmanna styrkja okkur og er framlag Reykjavíkurprófastsdæmis eystra myndarlegast eða 630 þúsund krónur á liðnu ári. Einnig hafa margir söfnuðir þjóðkirkjunnar stutt starfið en mest komið frá Hallgrímskirkju, þ.e. tæplega 1,6 milljón í fyrra m.a. vegna samskóta.

Framkvæmdastjóri SÍK er formaður nefndar þjóðkirkjunnar um kristniboð og hjálparstarf sem skipuð er af kirkjuráði til að efla skilning á þeim málum innan kirkjunnar.

Verkefnið um tengsl sókna á Íslandi við sóknir í systurkirkjum okkar í Keníu og Eþíópíu er í gangi en mætti vera betur sinnt. Á annan tug sókna hafa tekið að sér vináttusamband undir heitinu Söfnuður til safnaðar. Jón Pálmi Davíðsson var fulltrúi SÍK á leikmannastefnu þjóðkirkjunnar.

## Lindin og samkirkjulegt starf

SÍK styður útvarpsstöðina Lindina með mánaðarlegu framlagi og einnig flytja starfsmenn og sjálfboðaliðar Kristniboðssambandsins þar hugleiðingar, kynna starfið eða sinna dagskrárgerð. Lindin auglýsir samkomur og viðburði á vegum SÍK. Þrír af svonefndum meðlimum Lindarinnar sem sitja aðalfundi

hennar eru tilnefndir af SÍK.

SÍK tekur einnig þátt í samkirkjulegum bænastundum sem haldnar hafa verið í Friðrikskapellu frá því í ágúst 2008. Beðið er fyrir þjóðinni og ráðamönnum hennar.

Framkvæmdastjóri SÍK hefur verið formaður Alfa á Íslandi undanfarin ár. Kristján Þór Sverrisson þýddi nýtt Alfa-efni fyrir unglunga.

Kristján Þór er fulltrúi SÍK í undirbúningsnefnd Global Leadership Summit (GLS) ráðstefnu sem haldin hefur verið undanfarin ár í byrjun nóvember, nú síðustu árin í Háskólabíói.

## Vettvangur þróunarsamvinnu

SÍK er í óformlegu samstarfi átta mannuáarsamtaka í þróunarsamvinnu. Hist er þrisvar á ári, eða oftast ef þörf krefur, og rætt um sameiginleg hagsmunamál. Framkvæmdastjóri situr, tilnefndur af samtökunum, í þróunarsamvinnunefnd á vegum utanríkisráðuneytisins sem er ráðherra til ráðgjafar um þann málaflokk. Ýmis samskipti eru við þróunarsamvinnusvið ráðuneytisins vegna málaflokksins og samninga um verkefni sem það styður.

## 5. Fjármál og skrifstofa

### Skrifstofa og afgreiðsla

Skrifstofa og afgreiðsla SÍK er í Miðbæ við Háaleitisbraut, 2. hæð, fyrir neðan Kristniboðsalinn. Kristín Bjarnadóttir sinnir daglegum störfum gjaldkera en Ragnheiður Arnkelsdóttir bókhaldi.

### Basarinn

Basarinn, nytjamarkaður Kristniboðssambandsins er í Austurveri. Rekstrartekjur námu 21,7 milljónum króna í fyrra. Fjöldi sjálfboðaliða aðstoðar við verðmerkingu, tiltekt og afgreiðslu. Á sama stað eru einnig til sölu bækur bókaútgáfunnar Salts og aðrar kristilegar bækur, innlendar og erlendar.

Til stendur að stækka Basarinn út á stéttina í norður og austur en ýmislegt hefur tafið þau áform. Tími er kominn á að endurnýja ytri vegg hússins og sinna margvíslegu viðhaldi í sameign.

## Fjármál

Kristniboðssambandið fær tekjur sínar að mestu leyti frá trúföstum velunnurum starfsins. Notuð frímerki og erlend smámynt er góður tekjustofn. Jarle Reiersen hefur lagt mjög mikla vinnu í að koma þeim í verð og góður hópur sinnir klippivinnu. Unnið er að því að finna arftaka Jarle sem umsjónarmanns verkefnisins. SÍK er í samstarfi við Íslandspóst um söfnun umslaga og frímerkja á afgreiðslustöðum Póstsins í janúar. Tekjur af frímerkja- og myntsölu í fyrra var rúmar 4,6 milljónir og tekjur af verkefninu Látum skóna ganga aftur, sem unnið er í samstarfi við Sorpu, 2,4 milljónir.

SÍK tekur við sérmerktum gjöfum í menntasjóð til menntamála í Keníu og Eþíópíu. Þær fara í skólabyggingar, skólastarf eða stuðning við einstaka nemendur.

Heildartekjur ársins 2018 voru rétt tæpar 80 milljónir en útgjöld rúmar 98 milljónir. Hluti hallans er vegna verkefna sem búið var að gefa til og fjármagna áður, en eftir að framkvæma. Heildarfjárhagsáætlun yfirstandandi árs er um 111 milljónir króna og hækkunin m.a. vegna styrkja utanríkisráðuneytisins til skólabygginga í Keníu. Jafnframt er ljóst að auka þarf tekjur eða draga úr umsvifum á næstu árum að öllu óbreyttu.

## Þakkarorð

Stjórn SÍK þakkar öllum sem tengjast Kristniboðssambandinu með beinum eða óbeinum hætti og hafa lagt starfinu lið með fjárframlögum, munum á Basarinn, frímerkjum, sjálfboðavinnu, fyrirbænum og öðru sem hefur orðið starfinu til eflingar. Í þessari skýrslu hafa sum nöfn verið nefnd og önnur eru ónefnd en nokkrir tugir sjálfboðaliða bera þunga starfsins og fjáröflunar hér á landi.

Við horfum fram á við í von til Drottins sem kallar til verka, að bjarga uppskerunni og bæta líf fólks til frambúðar með margvíslegri kærleikspjónustu.

## F.h. stjórnar og starfsmanna SÍK (Kristniboðssambandsins)

### Ragnar Gunnarsson, framkvæmdastjóri





**En mér er líf mitt einskis virði, fái ég aðeins að fullna skeið mitt og þá þjónustu, sem Drottinn Jesús fól mér: Að bera vitni fagnaðarerindinu um Guðs náð.**

Postulasagan: 20:24

## KRISTNIBOÐSSAMBANDIÐ

Háaleitisbraut 58-60, 108 Reykjavík  
Sími: 533 4900 Netfang: sik@sik.is

WWW.SIK.IS